



UKA 2019/66
1. oktober 2019

Múte Bourup Egede

Inatsisip nr. 262, 16. marts 2016 ilanngunnissaannut, selskab-it inatsisaata, inuussutissarsiutigalugu suliffeqarfiutilinnut inatsisaata, inuussutissarsiutigalugu fond-it inatsisaata, inatsisillu tamalaat (Piginnittuiit nalunaarsornissaat eqqunneqarnissaanut) allanngortinnissaat anguniarlugit Naalackersuisut, Danmark-ip Naalackersuisuinut attaveqarnissaannut peqquneqarnissaannik, Inatsisartut aalajangiiffigisassaattut siunnersuut.

(Partii Naleqqamit Inatsisartunut ilaasortaatitai)

Inuiaat kalaallit pisuussutaasa atornerat, nunatsinnilu inuussutissarsiornermik ingerlataqaraanni inuiaqatigiinnut tunniussaqaarnissaq kivitseqataanissarlu pisussaaffinnik nassataqarpoq, pisariaqarlunilu – Inuussutissarsiortut atugaasa pitsaasuunissaat pitsanngorsartuarnissaallu ingerlagaluarpalluunniit pisariaqartut.

Inuit Ataqatigiit isumaqarput ammasumik ingerlatsineq pisariaqartuusoq, naalackersuinikkuuppat, inuussutissarsiornermi suliffeqarfiit, ingerlatseqatigiiffiit assigisaasallu aamma ilanngullugit avaqqunneqarsinnaangitsoq.

Siunnersuuteqartullu, Partii Naleqqap Inatsisartunut ilaasortaatitaat naleqartitatsinnut naapertuuttumik qaqitsimmata qutsavigaagut.

Siunnersuutigineqartoq danskit inatsisaat, inatsit nr. 262, 16. marts 2016-imeersoq nunatsinni atuutilissappat, malitsigisussaavaa ingerlatseqatigiiffinni piginnittuiit ilaanni paasiuminaatumik aaqqissugaasinnaasartut; tassa suliffeqarfimmi piginneqataasut allatulluunniit aaqqissuussinikkut nakkutilliisuullutilluunniit aqutsisuusut kikkunerisa nalunaarsorneqartalernissaat.

Inuit Ataqatigiit siunnersuutip imarisaata nunatsinnit atuutsilerneqarluni piviusunngortinnissaa pissusissamisuuginnartutut isigaarput. Siunnersuuteqartullu tunngavilersuutaanni isumaqatigaarput, ilaatigut aalisarnermi aatsitassarsiornermiluunniit kikkut piginnituiunersut suliffeqarfimilluunniit aqutsisuunersut qulakkeernissaannut sakkussatsialammik siunnersuut ammaassisinnaasoq.

Pissusissamisuuginarpormi kikkugaluarnersut, inuiaat kalaallit pisussutaannik atuisuunissaannik piginnaatissallugit aalianginnginnermi, ilisimassallugu periarfissinnialikkavut qanoq tunuliaqutaqarnersut. Siunnersuummimi qaqqineqartumi siunertaasut pingaarnerit ilaat tassaapput; ammasumik ingerlatsinikkut, suliffeqarfiit peqqarniisaarnianit, aningaasanik peqquserlunnianit, akileraarnaveersaarluni ingerlatsisunut assigisaanullu akiuniarnissamut sakkussatut.

INUIT ATAQATIGIIT

Inatsisartuni



Nunatsinni suliffeqarfiit ilaat piginnittoqarnikkut allatut aaqqissuussaanerarlugit piffissap ingerlanerani pasillerneqartarnerat oqallinnerni arajutsineqarnikuugunangilaq.

Taakkunani tigussaanerpaat ilagigunarpaat Kuannersuarni inuiaqatigiinni avissaartuuffigisatsinnik qinngornernik ulorianartunik, flouritalinnik saffiugassanillu arortikkuminaatsunik akulinnik aatsitassarsiorniat GME-p piginnittuut tunngasut. Ersarilluinnartumimmi suliffeqarfiup taassuma piginnittuisa annerit ilaat, Australiami aviisitigut peqqarniisaarnianik aningaasalersuisutut, peqquserlunermik inatsisinillu unuioqqutitsilluni ingerlatsisartutut ilisimaneqartoq aallaserineqartaraluarimat, nunatsinni Naalakkersuisunit iliuuseqarfigineqarsinnaannginnerarneqaannartartumik. Siunnersuutip uuma inatsisitigut ilaatigut periarfississavaa suliffeqarfiit qulaani soorlu taariikkama piginnittuisa kikkuunerinik kiisami piumasaqarsinnaanngorneq.

Naggataatigut, Naalakkersuisut siunnersuummut akissuteqaamminni tapersiinerat iluarisimaaraluarlugu ajornangippat ukioq ataaseq qaangiuppat aatsaat timitaliinialersarnerat sukkanerusumik pissasoq kissaatigaarput. Nunat tamalaat akornanni isumaqatigiissutit uagut aamma peqataaffigisavut eqquutsinniarlugit timitaliipallannissarput pisariaqartut ilaatigut isigigatsigu.

Taamak naatsumik oqaaseqarluta siunnersuut soqutiganartoq ataatsimiitsitaliamut susassaartumut innersuupparput.